

四庫全書

集部

欽定四庫全書

集部
唐詩品彙卷
十八至
二十一

詳校官檢討臣德生

助教臣常循覆勘

總校官進士臣朱鈐

校對官編修臣勵守謙

謄錄監生臣愍意誠

欽定四庫全書

唐詩品彙卷十八

明 高棅 編

五言古詩十八

接武^上

德宗皇帝

中和節賜百官燕集因示所懷

至化恒在宥保和茲息人推誠撫諸夏與物長為春仲

月風景煖禁城花柳新芳時協金奏賜宴同羣臣絲竹
豈云樂忠賢惟所親庶洽朝野意曠然天地均

重陽燕

當依對庭燎躬化勤意誠時此萬機暇適與佳節并曲
池潔寒流芳菊舒金英乾坤爽氣滿臺殿秋景清朝野
慶年豐高會多歡聲永懷無荒戒良士同私情

九月十八賜百寮追賞因書所懷

雨霽霜氣肅天高雲日明繁林已墜葉寒菊仍舒榮懿

此秋節時更延追賞情
池臺列廣宴絲竹傳新聲
至樂非外獎
泱歡同中誠
庶敦朝野意
永使風化清

送張建封還鎮

牧守寄所重才賢生為時
宣風自淮甸授鉞膺藩籬
入覲展遐戀臨軒慰來思
忠誠在方寸感激陳情詞
報國爾所向恤人予是資
歡宴不盡懷車馬當還期
穀雨將應候行春猶未遲
勿以千里遙而云無已知

玄宗皇帝

鵲鵠頌

有序

俯同魏光乘作

朕之兄弟唯有五人比為方伯歲一朝見雖載崇
藩屏而有睽談笑是以輟牧人而各守京職每聽
政之後延入宮掖申友于之志詠常棣之詩邕邕
如怡怡如展天倫之愛也秋九月辛酉有鵲鵠千
數棲集於麟德之庭樹竟旬焉飛鳴行搖得在原
之趣昆季相樂縱目而觀者久之逼之不懼翔集
自若朕以為常鳥無所志懷左清道率府長史魏

光乘才雄白鳳辯壯碧鷄以其宏達博識負至軒
檻預觀其事以獻其頌夫頌者所以揄揚德業褒
讚成功顧循虛昧誠有負矣美其彬蔚俯同頌云
伊我軒宮竒樹青蔥藹周廬兮冒霜停雪以茂以悅恣
卷舒兮連枝同榮吐綠含英曜春初兮蓐收御節寒露
微結氣清虛兮桂宮蘭殿唯所息宴棲雍渠兮行搖飛
鳴急難有病情有餘兮顧惟德涼夙夜兢惶慙化踈矣
上之所教下之所效實在予兮天倫之性魯衛兮政親

賢居兮爰遊爰處爰笑爰語巡庭除兮觀此翔禽以悅

我心良史書兮

原本編入
接武疑誤

郎士元

高仲武云士元河岳英奇人倫秀異自家刑國
遂擁大名右丞以往與錢更長郎公稍更開雅
近於
康樂

湘夫人詠二首

蛾眉對湘水遙哭蒼梧山萬乘既已沒孤舟誰忍還至

今楚山上猶有淚痕斑

南望淞陽路渺渺多新愁
桂酒神降時回風江上秋
彩雲忽無處碧水空安流

訓二十八秀才見寄

昨夜山月好故人來新思
清光到枕上嫋嫋涼風時
永意能在我惜無攜手期

宿判官江樓

適楚豈吾願思歸秋向深
故人江樓月永夜千里心
葉落攪鄉夢鳥啼驚越吟
寥寥更何有斷續空城砧

贈萬生下第還吳

直道多不偶，美才應息機。
霸陵春欲暮，雲海獨言歸。
為客成白首，入門嗟布衣。
尊羹若可憶，暫出掩柴扉。

關侯祠送高員外還荊州

將軍稟天安，義勇冠今昔。
走馬百戰場，一劍萬人敵。
誰為感恩者，竟是思歸客。
流落荊巫間，徘徊故鄉隔。
離筵對祠宇，灑酒暮天碧。
去去勿復言，唧悲向陳迹。

題劉相公三湘圖

昔日到衡霍邇來憶南州今朝平津邸兼得瀟湘遊稍
辨郢門樹依然芳杜洲微明三巴峽咫尺萬里流飛鳥
不知倦遠帆生暮愁潯陽指天末北渚空悠悠枕上見
漁父坐中常狎鷗誰言魏闕下自有東山幽

皇甫冉

高仲武云晉宋齊梁以來採掇者無數而補闕
獨獲驪珠使前賢失步後輩却立自非天假何
以達斯長轡未騁
芳蘭早凋悲夫

出塞

吹角出塞門
前瞻即胡地
三軍盡回首
皆灑望鄉淚
轉念關山長
行看風景異
由來征戍客
各負輕生義

訓裴十四

淮海各聯翩
三年方一見
素心終不易
玄髮何須變
舊國想平陵
春山滿陽羨
隣鷄莫遽唱
共惜良夜燕

之京留別劉方平

客子慕儔侶
含悽整朝裝
邀歡日不足
況乃前期長
離袂惜嘉月
遠還勞折芳
遲回越二陵
回首但蒼蒼
喬木

清宿雨故關愁夕陽人言長安樂其奈緬相望

題裴二十一新園

東郭訪先生西郊尋隱路久為江南客自有雲陽樹已
得閒園心不知公府步閉門白日晚倚杖青山暮果熟
任霜封籬疎從水度窮年常牽綴往事惜淪誤唯見偶
耕人朝朝自來去

李端

古別離

水國葉黃時洞庭霜落夜行舟問商賈宿在楓林下此地送君還茫茫似夢間後期知幾日前路轉多山巫峽通湘浦迢迢隔雲雨天晴見海檣日落聞津鼓人老自多愁水深難急流清宵歌一曲白首對汀洲

留別柳仲庸

惆悵流水時蕭條背城路離人出古亭嘶馬入寒樹江海正風波相逢在何處

野亭三韵送錢員外

野菊開欲稀寒泉流漸淺幽人步林後歎此年華晚倚
杖送行雲尋思故山遠

歸山招王達

日長原野靜杖策步幽巘雉鳴麥苗陰蝶飛谿草晚我
生好閒放此去殊未返自是君不來非關故山遠

適谷口元贊善所居

入谷訪君來秋泉已堪涉林間人獨坐月下出相接重
露濕蒼苔明燈照黃葉故交一不見素髮何稠疊

盧綸

太白西峯偶宿書懷

弱齡兼昧鄙，遇勝唯求止。
如何羈旅中，得步青冥裏。
青冥有桂叢，冰雪兩仙翁。
毛節未歸海，丹梯閒倚空。
逍遙擬上清，洞府不知名。
醮罷雨當至，客辭山忽明。
山明鳥聲樂，日氣生石壑。
石壑樹脩脩，白雲如水流。
白雲消散盡，壑埃儼然秋。
積阻山河固，綿聯烽戍稠。
五營承廟畧，四野失邊愁。
吁嗟繫塵役，又負靈山迹。
芝朮自芳香，塵

沙幾沉溺書此欲沾衣平生事每違煙霄不可仰鸞鶴
任追隨

送吉中孚歸楚州舊山

青袍芸閣郎談笑挹侯王舊錄藏雲穴新詩滿帝鄉名
高閒不得到處人爭識誰知冰雪顏已雜風塵色此去
復如何東臯岐路多藉茆臨紫陌回首憶滄波年來倦
蕭索但說淮南樂並檝湖中遊連檣月下泊公溜入閭
門千燈夜市喧喜逢鄰舍伴遙語問鄉園下淮風自急

樹杪分郊邑送客隨岸行離人出舟立漁村遶水田澹
浦隔晴煙欲就林中醉先期石上眠林昏天未曙且向
雲邊去暗入無路山心知有花處登高日轉明下望見
春城洞裏草空長塚邊人自耕寥寥行異境過盡千峯
影露色凝古壇泉聲落寒井仙成不可期多別自堪悲
為問桃源客何人見亂時

送顧秘書歸岳州

黃葉落不盡蒼苔隨雨生當軒置尊酒送客歸江城竹

裏聞機杼舟中見弟兄岳陽賢太守應為改鄉名

上巳日陪齊相公花樓宴

鍾陵暮春月飛觀延羣英晨霞耀中軒滿席羅金瓊持
盃凝遠睇觸物結幽情樹色參差綠湖光潏灩明禮卑
瞻絳帳恩浹厠華纓徒記山陰興今日乃為榮

和李中丞酬萬年房少府過汾州景雲觀因以

寄

房李早年
同居此觀

顯晦澹無跡賢哉常晏如如何驚孤鶴忽乃得雙魚叙

以泉石舊悵然風景餘低徊青油幕夢寐白雲居玉洞
桂香滿雪壇松影踈沉思矚仙侶紆組正軍書積學早
成道感恩難遂初梅生諒多感歸止豈吾廬

與張櫂對酌

櫂當作濯

張翁對盧叟一榼山村酒傾酒請予歌忽蒙張翁呵呵
余官非屈曲有怨辭多歌罷謝張翁所思殊不同余悲
方為老君責一何空曾看樂官錄向是悲翁曲張老聞
此詞汪汪淚盈目盧叟醉言麤一盃凡數呼回頭顧張

老焉敢戲為儒

奉陪侍中遊石笋谿十二韵

朝日照靈山山谿浩紛錯圖書無舊記
鯨禹應新鑿雙壁瀉天河一峯吐蓮萼
潭心亂雪卷巖腹繁珠落彩蛤攢錦囊
芳蘿嫋花索猿羣曝陽嶺龍穴腥陰壑
靜得漁者言閒聞洞仙博歌松倚朱幃
廣石屯油幘國泰事留侯山春縱康樂
間關殊狀鳥爛熳無名藥欲驗少君方
長吟大隱作旌幢不可駐古塞新沙漠

司空曙

關山月

蒼茫明月上夜久光如積
野漠冷胡霜關樓宿邊客
隴頭秋露暗磧外寒沙白
唯有故鄉人霑裳此聞笛

令狐峘

硤州旅舍懷蘇州韋郎中

公頻有尺書頗
積離鄉之思

儒服學從政遂為塵事嬰
命東復西孰堪異鄉情懷
祿且懷思策名敢逃名羨
彼農畝人白首新交并江
山

入秋氣草木彫晚榮芳塘寒露凝旅館涼颼生懿交守
東吳夢想聞頌聲雲水方浩浩離憂何時平

朱長文

宿新安江深渡館寄鄭州王使君

霜飛十月中搖落衆山空孤館閉寒水大江生夜風賦
詩應有意沈約在關東

余延壽

南州行

搖艇至南國國門連大江中洲兩邊岸數步一垂楊金
釧越谿女羅衣胡粉香纖練春卷幔採蘋暝提筐弄瑟
嬌垂幌迎人笑下堂河頭浣衣處無數紫鴛鴦

折楊柳

天道連國門東西種楊柳歲華君不見裊娜垂來久綠
枝栖暝禽雄去雌獨吟餘花怨春盡微月起秋陰坐望
窻中蝶起攀枝上葉好風吹長枝婀娜何如妾妾見柳
園新高樓四五春莫吹胡塞曲愁殺隴頭人

顧況

皇甫湜序畧云吳中山水氣象君居吳中長於
逸詩往往若穿天心出月竚意外驚人語非尋
常所能及也

擬古

龍劍昔藏影送雄留其雌人生阻懽會神物亦別離碧
樹感秋落佳人無還期夜瑟為君咽浮雲為君滋

棄婦詞

古人雖棄婦棄婦有歸處今日妾辭君辭君欲何去本

家零落盡慟哭來時路憶昔未嫁君聞君甚周旋及與
同結髮值君適幽燕孤魂託飛鳥兩眼如流泉流泉咽
不燥萬里關山道及至見君歸君歸妾已老物情弃衰
歇新寵方妍好拭淚出故房傷心劇秋草妾以憔悴捐
羞將舊物還餘生欲有寄誰肯相留連空牀對虛牖不
覺塵埃厚寒水落芙蓉秋風墮楊柳記得初嫁君小姑
始扶牀今日君棄妾小姑如妾長回首語小姑莫嫁如
兄夫

弋陽谿中望仙人城

何草乏靈姿無山不孤絕我行雖云蹇偶勝聊換節上
界浮中流光響洞明滅晚禽曝霜羽寒魚依石髮自有
無還心隔陂望松雪

嚴公釣臺作

靈芝產遐方威鳳駕重霄嚴公何耿潔託志肩夷巢漢
后雖則貴子陵不知高糠粃當世道長揖夔龍朝掃門
彼何人昇降不同朝捨舟遂長往山谷多清飈

奉同郎中韋使君郡齋雨中宴集

好鳥依嘉樹飛雨灑高城況與數君子列坐分兩楹文
雅一何麗林塘含餘清我公未歸朝遊子不待晴白雲
帝鄉遠滄江楓葉鳴拜手欲無言零淚如酒傾寸心已
摧折別離方骨驚安得凌風翰肅肅實天京

劉太真

顧十二左遷過韋蘇州房杭州韋睦州三使君
皆有郡中宴集詩辭意高麗鄙夫人之所仰慕

顧生既至留連笑語因以成篇以繼三君子之

風

寵至乃不驚罪及非無由奔迸歷畏途緬邈赴遐陬牧
此彫弊毗屬當賦歛秋夙興諒無補旬暇焉敢休前日
懷友生獨登城上樓迢迢西北望遠思不可收今日車
騎來曠然消人憂晨迎東齋飯晚度南谿遊以我碧流
水泊君青翰舟莫將遷客程不為勝境留飛札謝三守
斯篇希見訓

朱倣

剡谿行却寄新別者

潺湲寒溪上自此成離別回首望歸人移舟逢暮雪頻
行識草樹漸老傷年髮唯有白雲心為向東山月

竇參

高仲武云竇君詩亦祖沉千運
比之孟雲卿尚在廊廡之間矣

遷謫江表久未歸

一自經放逐徘徊無所從便為寒山雲不得隨飛龍名

豈不欲得歸豈不欲早若無三月資難適千里道離心
與羈思終日常草草人生年幾齊憂苦則先老誰能假
羽翼使我傷懷抱

登潛山觀

山勢欲相抱一條微逕盤攀蘿歇復行始得凌仙壇聞
道葛夫子此中煉還丹丹成五色光服之生羽翰靈草
空自翠餘霞誰共餐至今步虛處猶有孤飛鸞幽幽古
殿門下壓浮雲端萬丈水聲落四時松色寒既入無何

鄉轉嫌人事難終當遠塵俗高卧從所安

姚係

京口遇舊識兼送往隴州

蟬鳴一何急日暮秋風樹即此不勝愁隴陰人更去相逢與相失共是亡羊路

五老峯大明觀贈隱者

雲觀此山北與君攜手稀林端涉橫水洞口入斜暉乍見鸞鶴邇忽為煙霧飛故人清和客默含琴心微丹術

幸可授青龍當未歸悠悠平生意此日復相違

送周愿判官歸嶺南

早蟬望秋鳴夜琴怨離聲
耿然多異感值子江山行
由來重義人感激事縱橫
往復念遐阻淹留慕平生
晨奔九衢餞暮始萬里程
山驛風月榭海門煙霧城
易綃泉源近拾翠沙溆明
蘭蕙一為贈貧交空復情

劉灣

出塞曲

將軍在重圍音信絕不通羽書如流星飛入甘泉宮倚
是并州兒少年心膽雄一朝隨召募百戰爭王公去年
桑乾北今年桑乾東死是征人死功是將軍功汗馬牧
秋月瘁卒卧霜風仍聞左賢王更欲圖雲中

李陵別蘓武

漢武愛邊功李陵提步卒轉戰單于庭身隨漢軍沒李
陵不愛死心存歸漢闕誓欲還國恩不為匈奴屈身辱
家已無長居虎狼窟胡天無春風虜地多積雪窮陰愁

殺人況與蘇武別發聲天地哀執手肺腸絕白日為我
愁陰雲為我結生為漢宮臣死為胡地骨

李希仲

仲武中興間氣集評希仲詩云殊輕靡華勝於
實此所謂才力不足務為清逸然前軍飛鳥落
格鬪塵沙昏亦出塞實錄
疊疊不絕者可及于中矣

薊門行二首

旄頭有精芒胡騎獵秋草羽檄南渡河邊庭用兵早漢
家愛征戰宿將今已老辛苦羽林兒從戎榆關道

一身救邊速烽火連薊門前軍飛鳥落格鬪塵沙昏寒
入鼓聲急單于將夜奔當須徇忠節身死報國恩

蘇渙

杜甫稱其詩以為渙思慮出書
篋几杖之外隱隱留金石聲云

變律

養蠶為素絲葉盡蠶亦老傾筐對空林此意向誰道一
女不得織萬夫受其寒一夫不得意四海行路難禍亦
不在大福亦不在先世路險孟門吾徒當勉旃

戎昱

塞上曲二首

慘慘寒日沒北風捲蓬根將軍領疲兵却入古塞門迴
首指陰山殺氣成黃雲

樓上畫角哀即知兵心苦試問左右人無言淚如雨何
意休明時終年事鼙鼓

從軍行

昔從李都尉雙鞬照馬蹄擒生黑山北殺敵黃雲西太

白沉虜地邊草復萋萋歸來邯鄲市百尺青樓梯感激
然諾重平生膽力齊芳筵暮歌發艷粉輕鬟低半醉秋
風起鐵騎門前嘶遠戎報烽火孤城嚴鼓聲揮鞭望塵
去少婦莫含啼

苦哉行

妾家清河邊七葉承貂蟬身為最小女偏得渾家憐親
戚不相識幽閨十五年有時最遠出祇到中門前去年
狂胡來懼死翻生全令秋官軍至豈意遭戈鋌脫身出

虎口不及歸黃泉苦哉難重陳暗哭蒼蒼天

長安秋夜

八月更漏長愁人起常早閉門寂無事滿院生秋草昨夜西窓夢夢行荆南道遠客歸去來在家貧亦好

湖南雪中留別

草草還草草湖南別離早何處愁殺人歸鞍雪中道出門迷轍迹雲水白浩浩明日武陵西相思鬢堪老

同辛兖州巢父盧副端岳相思獻酬之作因舒

歸懷兼呈辛魏二院長楊長寧

暮角發高城，情人坐中起。
臨觴不及醉，分散秋風裏。
雖有明月期，離心若千里。
前歡反惆悵，後會還如此。
焉得夜淹留，一回終宴喜。
羈遊復牽役，館至重湖水。
早晚泛歸舟，吾從數君子。

撫州處士湖泛舟送北迴兩指此南昌縣查溪
蘭若別

移罇鋪山曲，祖帳查溪陰。
鋪山即遠道，查溪非故林。
悽

然誦新詩落淚霑素襟
郡政我何有別情君獨深
禪庭古樹秋宿雨清沉沉
揮袂故里遠悲傷去住心

李益

大厯以後嚴滄浪
深取者李益耳

觀回軍

行行上隴頭隴月暗悠悠
萬里將軍沒回旗隴戍秋
誰令嗚咽水重入故營流

入南山至全師蘭若

木隕水歸壑寂然無念心南行有真子被褐息山陰石
路瑤草散松門寒景深吾師亦何授自起定中吟

送諸暨王主簿之任

別愁已萬緒離曲方三奏遠宦一辭鄉南天異風候秦
城歲方老越國春山秀落日望寒濤公門閉清晝何用
慰相思裁衣寄關右

聞亡友王七嘉禾寺得素琴

故人昔此去留琴明月前今來我訪舊淚灑白雲天詎

欲匣孤響送君歸
夜泉撫琴猶可絕
況此故無絃何必
雍門奏然後使潺湲

送遼陽使還軍

征人歌且行
北去遼陽城
二月戎馬息
悠悠邊草生
青山出塞斷
代地入雲平
昔者匈奴戰
多聞殺漢兵
平生報國憤
日夜角弓鳴
勉君萬里去
勿使虜塵驚

華山南廟

陰山臨古道
古廟閉山碧
落日春草中
塞芳薦瑤席
明

靈達精意髣髴如不隔岩雨神降時回飈入松栢嘗聞
炕儒後此地反秦壁自古害忠良神其輔宗祏

將赴朔方早發漢武

弭蓋出故關窮秋首邊路問我此何為平生重一顧風
吹山下草繫馬河邊樹奉役良有期回瞻終未屢去鄉
幸未遠戍衣今已故豈惟幽朔寒念我機中素去矣勿
復言所酬知者遇

唐詩品彙卷十八

欽定四庫全書

唐詩品彙卷十九

明 高棟 編

接武

下

于鵠

秦越人洞中詠

扁鵲得仙處傳是西南峯年年山下人長見騎白龍洞
門黑無底日夜唯雷風清齋將入時戴花兼抱松石逕

陰且寒地響如遠鐘似行山林外聞乘屐聲重低礙更
俯身漸遠晝夜同時時白蝙蝠飛入茅衣中行久路轉
窄靜聞水淙淙但願逢一人自得朝天宮

宿西山修下元齋咏

幽人在何處松檜深冥冥西峯望紫雲知有安期生沐
浴溪水暖新衣禮仙名脫履入靜堂遶像隨禮行碧紗
籠寒燈長燭綴金鈴林下聽法人起踐枯葉聲啓奏修
律儀天曙山鳥鳴分行布管茅列坐滿中庭持齋候撞

鐘玉函散寶經焚香開卷時照耀金室明投簡石洞深
稱遇上帝靈學道能苦心自古無不成

入白芝尋黃尊師

觸煙入溪口茫茫唯檉樾其中飛碧流十里不通屐出
林尚未明細徑懸峭壁把藤偕行勢光滑猿跡忽然
風景異乃到神仙宅天晴茅屋頭殘雪蒸氣白隔窻梳
髮聲久立聞吹幘抱琴出門來不是人間客幽院無灑
掃四時自虛寂落葉埋長松出地纔數尺曾讀上清經

去住長生籍願示不死方何山有瓊液

過凌霄斷天謁張先生祠

戢戢亂峯裏一峯獨凌天下看如火高上有十里天至
人愛幽深一住五十年懸牘到其上乘牛耕藥田衣食
不下求乃是雲中仙山僧獨知處相引衝碧煙斷崖晝
昏黑流泉橫雙椽面壁攀石稜養力方敢前累歇日初
沒始到茆堂邊見客不問誰禮質無周旋醉卧枕歌樹
坐寒展青氍折松掃藜牀秋菓顏色鮮白犬舐客衣驚

走聞腥羶乃知軒冕徒寧比雲壑眠

戴叔倫

劉須溪云幼公諸詩
短處更深長處愈淺

獨不見

前宮路非遠舊苑春將徧
玉戶看早梅彫梁數歸燕
身輕逐舞袖香暖傳歌扇
自和秋風詞長侍昭陽殿
誰信後庭人年年獨不見

去婦怨

出婦不敢啼風悲日悽悽
心知恩義絕誰忍分明別
下坂車麟麟畏逢鄉里親
空持牀前幔却寄家中人
忽辭王吉去為是秋胡死
欲比今日情煩冤不相似

潭州使院書情寄江夏賀蘭副端

雲雨一蕭散悠悠關復河
俱從泛舟役近隔洞庭波
春水去不盡秋風今又過
無因得相見却恨寄書多

新秋夜寄江右友人

遙夜獨不寐寂寥蓬戶中
河明五陵上月滿九門東
萬

里親友散故園江海空懷歸正南望此夕起秋風

長孫佐輔

隴西行

陰雲凝朔氣隴上正飛雪四月草不生北風勁如割朝
來羽書急夜宿長城窟道隘行不前相呼抱鞍歇人寒
指欲墮馬凍蹄皆裂射鴈旋充饑斧冰還止渴寧辭解
圍鬪但恐乘疲沒早晚邊候空歸來養辛骨

關山月

悽悽還切切戍客多離別何處最傷心關山見秋月關
月竟如何由來遠近過始經玄兔塞終照白狼河忽憶
秦樓婦流光應共有已得並蛾眉還知攬纖手去歲照
同行比翼復連形今宵照獨立顧影自焚焚餘暉漸西
落夜夜看如昨借問映旌旗何如鑒帷幙拂曉朔風悲
蓬驚鴈不飛幾時征戍罷還向月中歸

山行經村徑

一徑有人迹到來惟數家依稀聽機杼寂歷看桑麻雨

濕渡頭草風吹墳上花却驅羸馬去數點歸林鴉

山居

看書愛幽寂結宇青冥間飛泉引風聽古桂和雲攀地
深草木稠境靜魚鳥閒陰氣晚出谷朝光先照山有時
獨杖藜入夜猶啓關星昏歸鳥過火出樵童還神體自
和適不是離人寰

楚州鹽壩古牆望海

混沌本冥冥泄為洪川流雄哉大造化萬古橫中州我

從西北來登高望蓬丘陰晴乍開合天地相沉浮長風
卷繁雲日出扶桑頭水淨露鮫室煙銷凝屈樓時來會
雲翔道蹇即津遊明發促歸軫滄波非宿謀

山行書事

日落風颼颼驅車行遠郊中心有所悲古墓守黃茅茅
中狐兔窠四面烏鳶巢鬼火時獨出人煙不相交行行
近林村一徑歌還坳迎雲聽蟋蟀向月看蠨蛸翁喜客
來坐客來羞厨庖濁醪誇潑螳時菓仍新苞相勸對寒

燈呼兒爇枯樵雅撲頗近古其言無斗筭憂歡世上并
歲月途中拋誰知問津客空作揚雄嘲

楊凌

奉詔韋滁州寄示

淮陽為郡暇坐惜流芳歇散懷累榭風清暑澄潭月陪
燕辭三楚戒途綿百越非當遠別離雅奏何由發

崔元翰

奉和聖製中元日題奉敬寺

妙道非本說殊途成異名聖人得其要俱以化羣生鳳
吹從上苑龍宮連外城花鬢列後殿雲車駐前庭松竹
含新秋軒窓有餘清緬懷空同事須繼簫管聲離想境
都寂忘言理更精域中信稱大天下乃為輕屈已由濟
物堯心豈所榮

劉商

銅雀妓

魏主矜蛾眉美人美如王高臺無晝夜歌舞竟未足盛

色如轉圜夕陽落深谷仍令身沒後尚足平生欲紅粉
橫淚痕調絃向空屋舉頭君不在唯見西陵木玉輦豈
再來嬌鬟為誰綠那堪秋風裏更舞陽春曲曲罷情不
勝凭闌向西哭臺邊生野草來去胷羅縠

楊衡

盧十五竹亭送姪偁歸山

落葉寒擁壁清霜夜霑石正是憶山時復送歸山客殷
勤一樽酒曉月當窻白

寄贈田倉曹灣

芳蘭媚庭除灼灼紅英舒身為陋巷客門有絳轅車朝
覽夷吾傳暮習潁陽書眇雲高羽翼待價蘊璫璵纓弁
雖云阻音塵豈復踈若因風雨晦應念寂寥居

題玄和師仙藥室

山邊蕭寂室石掩浮雲局遶室唯有路松煙深冥冥入
松汲寒水對鶴開仙經石几香未盡木花風吹零何年
去華表幾度窮滄溟却顧宦遊子眇如霜中螢

九日陪樊尚書龍山宴集

孟嘉從燕地千乘復登臨緣危陟高步憑曠寫幽襟黃
花玩初馥翠物喜盈斟雲雜組繡色樂和山水音節搖
秋吹急筵卷夕光沉都人瞻騎火猶知隔寺深

遊陸先生故巖居

獨壑臨高嶂蒼苔絕行迹仰窺猿掛樹俯對鶴巢石上
有一巖屋相傳靈人宅深林無暘暉幽水轉終夕

秋夜閒居即事寄廬山鄭員外蜀郡傅處士

憂思繁未整良辰會無由引領遲佳音星紀縷以周蓬
閨絕華耀況乃處窮愁墜葉寒擁砌燈光夜悠悠開琴
弄清絃窺月俯澄流冉冉鴻鴈度蕭蕭帷箔秋長懷石
門詠緬慕碧雞遊髣髴像顏色崇蘭隱芳洲

登紫霄峯贈黃仙師

紫霄不可涉靈峯信穹崇下有瓊樹枝上有翠髮翁雞
鳴秋漢側日出紅霞中璨璨真仙子執旌為侍童焚香
杳忘言默思含太空世華從熠燿虛室自朦朧雲飛瓊

瑤圃龜息芝蘭藂玉錄掩不開天窓微微風茲焉悟佳
旨塵境亦幽通浩淼臨廣津永用挹無窮

武元衡

獨不見

荆門一柱觀楚國三休殿環珮儼神仙輝光生顧眄春
風細腰舞明月高堂宴夢澤水連雲渚宮花似霰俄驚
白日晚始悟炎涼變別島異波潮離鴻分海縣南北斷
相聞嗟嗟獨不見

送唐君次

都門去馬嘶灞水春流淺青槐驛路直白日離亭晚望
望煙景微草色行人遠

晨興贈友寄呈竇使君

江陵歲方晏晨起眄庭柯白露傷紅葉清風斷綠蘿徇
時真氣索念遠幽懷多夙昔東山意縱橫南浦波有美
嬋娟子百慮攢雙蛾絨情鬱不舒幽竹自駢羅為余歌
寒苦旨酒朱顏酡兩鬢
一作世事
浮雲變功名將奈何

旬暇西亭寄呈熊郎中副使

旬休屏戎事涼雨北窓眠一夜江城夢萬里繞山川
草木散幽氣池塘鳴早蟬妍芳落春後旅思生秋前
紅槿粲庭艷綠蒲繁渚煙行歌獨酌謠坐發朱絲絃
哀玉不可扣華觴徒湛然聞君東林卧郡閣曠周旋
酬對龍象侶灌注清冷泉如何無礙智猶苦病牽纏

羊士諤

九月十日郡樓獨酌

掾吏當授衣郡中稀物役嘉辰悵已失殘菊誰為惜
軒一尊泛天景洞虛碧暮節獨賞心寒江鳴湍石歸期
北州里舊交東山客飄蕩海雲深相思桂花白

小園春至偶書呈吏部竇郎中孟員外

松篠雖苦節冰霜慘其間欣欣發佳色如喜東風還幽
抱想前躅冥鴻度南山春臺一以眺達士亦解顏偃息
非老圃沉吟秘玄關暉忽復失壯歲不得閒君子當
濟物丹梯難共攀心期自有約去掃蒼苔山

權德輿

嚴滄浪云德輿却有絕似盛唐者
或有似韋蘇州處劉隨州處者

雜詩

溟水春正綠上宮蘭葉齊
光風兩搖蕩鳴珮出中閨
一顧授黃流千金呈瓠犀
徒然路傍子恍恍復悽悽

月夜江行

扣舷不能寐浩露清衣襟
彌傷孤舟夜遠結萬里心
幽興惜瑤草素懷寄鳴琴
三奏月初上寂寥寒江深

豐城劍池驛

龍劍昔未發泥沙相晦藏向非張茂先孰辯斗牛光神
物不自達聖賢亦彷徨我行豐城野慷慨心內傷

渭水

呂氏年八十皤然持釣鉤意在靜天下豈惟食營丘師
臣有家法小白乃尊周日暮駐征策愛茲清渭流

晚渡楊子江却寄江南親故

返照滿寒流輕舟任搖蕩支頤見千里煙景非一狀遠

岫有無中片帆風水上天清去鳥滅浦迥寒沙漲樹晚
疊秋嵐江空翻宿浪胷中千萬慮對此一清曠回首碧
雲深佳人不可望

感寓

殘雨倦歌枕病中時序分寒蟲與秋葉一夜隔窓聞虛
室對搖落晤言無與羣冥心試觀化世故如絲棼但看
鳶戾天豈見山出雲下俚徒擊節朱絃秘南薰柯梧秀
朝陽上有威鳳文終待九成奏來儀瑞吾君

古意

家人強進酒酒復能忘情持盃未飲時衆感紛已盈
明月照我傍庭柯振秋聲空階白露下枕席涼風生
所思萬里餘水闊山縱橫佳期憑夢想未晚愁雞鳴
願得一心人當年懽樂并長筵映玉姐素指彈秦箏
曼睇呈巧笑惠音激淒清此願良未果永懷空如醒

祇命赴京途次淮口因書所懷却寄使府羣公
弱植素寡偶超時非所任感恩再登龍求友皆斷金
彪

炳觀奇彩淒鏘聞雅音適欣佳期接遽歎離思侵靡靡
遵遠道忡忡勞寸心難成獨酌謠空奏伐木吟次寥清
冬時蕭瑟白晝陰交歡諒如昨滯念紛在今因風試矯
翼倦飛會歸林向晚清淮駛迴首楚雲深

早發杭州泛富春江寄陸三十六公祐

候曉起徒馭春江多好風白波連青雲蕩漾晨光中四
望浩無際沉憂將此同未離奔走徒但恐成悲翁俯視
觸餌鱗仰目凌霄鴻纓塵日已厚心累何時空泛泛此

人世所向皆焚籠唯應杯中物醒醉皆窮通故人玄圃
姿瓊樹分青蔥終當此山去共結蘭桂叢

劉禹錫

按唐史本傳云禹錫恃才而發偏心不無怨望
年並晏偃蹇寡所合乃以文章自適晚年尤精
於詩與白居易樂天諸人倡和白常推為
詩豪又云其詩在處有神物護持

團扇辭

團扇復團扇奉君清暑殿秋風入庭樹從此不相見上
有乘鸞女蒼蒼蟲網遍明年入懷袖別是機中練

詠古有所寄

車音想轡轡不見綦下塵可憐平陽地歌舞嬌青春金
屋容色在文園詞賦新一朝復得幸應知失意人

效阮公體

朔風悲老驥秋霜動驚禽出門有遠道平野多層陰滅
沒馳絕塞振迅拂華林不因感衰節安能激壯心

善卷壇下作

先生見堯心相與去九有斯民既已治我得安林藪道

為自然貴石是無窮壽瑤臺在此山識者常回首

秋晚題湖城驛池上亭

秋次池上館林暉照南榮塵衣紛未解幽思浩已盈風
蓮墜故萼霜菊含晚英恨為一夕客愁聽晨雞鳴

發華州留別張侍御

束簡下延閣買符驅短轅同人惜分袂結念醉芳樽切
切別絃思蕭蕭征馬煩臨岐無限意相見却忘言

登陝州城北樓却憶京師親友

獨上百尺樓日窮思亦愁
初日遍露草野思光悠悠
塵息長道白林清宿煙收
回首雲深處永懷帝鄉遊

登蘇州後登虎丘寺望海樓

獨宿望海樓夜深珍木冷
僧房已閉戶山月方出嶺
碧池涵劍彩寶剎搖星影
却憶郡齋中虛眠此時景

歲杪將發楚州呈樂天

楚澤雪初霽楚城春欲歸
清淮變寒色遠樹含清暉
原野已多思風霜潛滅威
與君同旅鴈向北刷毛衣

別友人後得書因以詩贈

前時送君去揮手青門橋路轉不相見猶聞馬蕭蕭今
得出關書行塵日已遙春還遲君至共結芳蘭苕

弔柳子厚

并序

元和乙未與故人柳子厚臨湘水為別柳浮舟適
柳州余登陸赴連州後五年余復從故道出桂嶺
至前別處而君沒於南中因賦以弔

憶昨與故人湘江岸頭別我馬映林嘶君帆轉山滅馬

嘶循故道帆滅如流電千里江離春故人今不見

秋江早發

輕陰迎曉日霞霽秋江明草樹含遠思襟懷有餘清凝
眸萬像起朗吟孤憤平渚鴻未矯翼而我已遐征因思
市朝人方聽晨雞鳴昏昏戀衾枕安見元氣英納爽耳
目變玩奇筋骨輕滄洲有奇趣浩蕩吾將行

寄陝州姚中丞

時分司
東都

八月天地肅二陵風雨收旌旗闕下來雲日關東秋禹

迹想前事漢臺餘故丘
徘徊襟帶地左右帝王州
留滯悲昔老恩光榮徹
侯相思望棠樹一寄商聲謳

和武中丞秋日寄懷簡諸僚故

退朝還公府騎吹息繁陰
吏散秋庭寂鳥啼煙樹深
威生奉白簡道勝外華簪
風物清遠目功名懷寸陰
雲衢念前侶綵翰寫中襟
涼菊照幽徑敗荷攢碧浥
感時江海思報國松筠心
空懷壽陵步芳塵何處尋

裴祭酒尚書見示春歸城東松塢別墅寄王左

丞高侍郎之什命同作

早宦閱人事晚懷生道機時從學省出獨望郊園歸野
酌渡春水山花應巖扉石頭解金章林下步綠薇青松
鬱成塢脩竹盈尺圍吟風起天籟蔽日無炎威危徑盤
羊腸連甍聳輦飛幽谷響樵斧澄潭環釣磯日見高帝
城冠蓋揚光輝白雲難持寄清韵投所希二公如長離
比翼翔太微含情謝林壑酬唱并珠璣顧余久郎潛愁
寂對芳菲一聞丘中趣再撫黃金微

李觀

宿裴有書齋

卧君山窓下山鳥與我言清風何颼颼松栢中夜繁
久遊失歸趣宿此似故園林煙橫近郊谿月落古原

楊巨源

題趙孟莊

管鮑化為塵交友存如線升堂俱自媚得路難相見
懿君敦三益顏俗期一變心同襲芝蘭氣合迴霜霰石門

雲卧久玉洞花尋遍王濬受旌旗梁竦勞州縣煙鴻秋
更遠天馬寒逾健願事郭先生青囊書幾卷

孟簡

擬古

劍客不誇貌主人知此心但營纖毫義肯計千萬金勇
發看驚擊憤來聽虎吟平生貴酬德兩敵無幽深

唐詩品彙卷十九

欽定四庫全書

唐詩品彙卷二十

明 高棟 編

五言古詩二十

正變

韓愈

唐司空圖云韓詩驅駕氣勢共掀雷決電晁氏客語云韓文公詩號杜體謂鋪叙而含蓄也若雖近不棄狎雖遠不肯戾該於理多矣蔡寬夫詩話云退之詩豪放自成一家特恨其深

婉未足 蘇東坡云書之美者莫如顏魯公然
書法之壞自顏始詩之美者莫如韓文公然詩
格之變自韓始 詩眼云退之詩早年亦學建
安如孤臣昔放逐暮行河堤上重雲贈李觀等
篇皆效建安體
但頗加新奇也

秋懷詩十一首

韓仲韶云此詩多自感其趣向
不與世合故末章有避語弄觸

心兵之語又以霜菊自歎可見其一時直道之
不容也劉須溪云秋懷詩終是豪宕非近語也

牕前兩好樹衆葉光蕤蕤秋風一披拂策策鳴不已微
燈照空牀夜半偏入耳愁憂無端來感歎成坐起天明
視顏色與故不相似義和馭白日疾急不可恃浮生雖

多途趨死唯一軌胡爲浪自苦得酒且歡喜

白露下百草蕭蘭共凋悴青青四墻下已復生滿地寒
蟬慙寂寞蟋蟀鳴自恣連行無窮期稟受氣苦異適時

各得所松栢不必貴

劉云甚怨
故松栢如此耳正言似反

青青者蕭也

彼時何卒卒我志何曼曼犀首空好飲廉頗尚能飯學
堂日無事驅馬適所願茫茫出門路欲去聊自歎歸還
閱書史文字浩千萬陳跡竟難尋賤嗜非貴猷犬夫意

有在女子乃多怨

劉云骯
髒愈高

秋氣日惻惻秋空日凌凌

劉云惻惻凌亦是自道

上無枝上蜩下

無盤中蠅豈不感時節耳目去所憎清曉卷書坐南山

見高稜其下澄湫水有蛟寒可晉惜哉不得往豈謂吾

無能

劉云可與古詩十九首上下而氣復過之

離離挂空悲懺懺抱虛警

劉云又勝

露泣秋樹高蟲弔寒夜

永歛退就新懦趨榮悼前猛歸愚識夷塗汲古得脩綆

名浮猶有耻味薄真自幸

劉云又怨

庶幾遺悔尤即此是幽

屏

葛立方韻語陽秋云此猶陶公歸去來辭覺今是而昨非之意似有所悟也

今晨不成起端坐盡日景蟲鳴室幽幽月吐牕
問問喪懷若迷方浮念劇含梗塵埃慵伺候文
字浪馳騁尚須勉其頑王事有朝請

秋夜不可晨秋日苦易暗我無汲汲志何以有此憾寒
鷄空在樓缺月煩屢瞰有琴具徽絃再鼓聽愈淡有如
乘風船一縱不可纜不如覩文字丹鉛事點勘豈必求
贏餘所要石與甌

卷卷落地葉隨風走前軒鳴聲若有意顛倒相追奔空

堂黃昏暮我坐默不言童子自外至

劉云謂童子不
喻退而誦詩耳吹

燈當我前問我我不應饋我我不餐退坐西壁下讀書

盡數篇作者非今士相去時已千其言有感觸使我復

悽酸顧謂汝童子置書且安眠丈夫屬有念事業無窮

年

劉云耿耿如在目前荆公
拋書還少年不如此暢

霜風侵梧桐衆葉著樹乾空階一片下瑤若摧琅玕

劉云
甚無

緊要造
此奇崛

謂此夜氣滅望舒賈其團青冥無依倚飛轍危

難安驚起出戶視倚楹久沈瀾憂愁費晷影日月如跳

九迷復不計遠為君駐塵鞍

暮暗來客去羣鷺各收聲悠悠偃宵寂疊疊抱秋明世

累忽進慮外憂遂侵誠強懷張不滿弱念缺易盈

劉云時時

有自得語

詰屈避語寔寔觸心兵敗虞千金弃得比寸草

榮知耻足為勇晏然誰汝令

鮮鮮霜中菊既曉何用好揚揚弄芳蝶爾生還不早運

窮兩值遇婉孌死相保西風蟄龍蛇衆木日凋槁由來

命分爾泯滅豈足道

葛立方云此則似有不過時之嘆也劉云甚悲惋自足有守死不

易之志陳去非以為躁豈其然哉 又云十韻
皆豪壯感激不類選體最後詩氣短然極狀切也

夜歌

靜夜有清光閨堂仍獨息念身幸無恨志氣方自得樂

哉何所憂所憂非我力

樊澤之云此篇作於貞元中時
強藩悍將可為朝廷憂公方嘆

謀計之未就雖
欲憂非所力也

暮行河堤上

暮行河堤上四顧不見人哀草際黃雲感嘆愁我神夜

歸孤舟臥展轉空及晨謀計竟何就嗟嗟世與身

樊澤
之云

此篇與夜
歌意同

長安交游者贈孟郊

長安交游者貧富各有徒親朋相過時亦各有以娛陋

室有文史高門有笙芋何能辨榮悴且欲分賢愚

葛立方云

公此詩貧者文史之樂
賢於富者笙芋之樂也

宿曾江口示姪孫湘

每行亡故道屈曲高林間林間無所有奔流但潺潺嗟

我亦拙謀致身落南蠻茫然失所詣無路何能還

劉云氣短

極寥寥之思
非平生比也

落葉送陳羽

落葉不更息
斷蓬無復歸
飄颻終自異
邂逅暫相依
悄悄深夜語
悠悠寒月輝
誰云少年別
流淚各沾衣

晚菊

此詩在陽山窮
獨不自聊而作

少年飲酒時
踴躍見菊花
今來不復飲
每見恒咨嗟
佇立摘滿手
行行把歸家
此時無與語
棄置奈悲何

從仕

貞元十七年始
從調京師而作

居閒食不足從仕力難任兩事皆害性一生恒苦心黃
昏歸私室惆悵起嘆音棄置人間世古來非獨今

哭楊兵曹

凝

陸欽州

參

人皆期七十纔半豈蹉跎數出知己淚自然白髮多晨
興為誰慟還坐久滂沱論文與寤語已矣可如何

感春

偶坐藤樹下暮春下旬間藤陰已可庇落莖還漫漫疊
疊新葉大瓏瓏晚花乾青天高寥寥兩蝶飛翻翻時節

適當爾懷悲自無端

劉云無緊無要寫得沉至不同末語動人

出門

樊澤之云此詩在京師不得志而作故其辭如此

長安百萬家出門無所之豈敢尚幽獨與世實參差
古人雖已死書上有其辭開卷讀且想千載若相期
出門各有道我道方未夷且於此中息天命不吾欺

送李正字

儼

歸湖南

長沙入深楚洞庭值秋晚人隨鴻鴈少江共葉葭遠
歷歷余所經悠悠子當返孤遊懷耿介旅宿夢婉婉
風土

稍殊音魚蝦日異飯親交俱在此誰與同息偃

幽懷

幽懷不可寫行此春江潯適與佳節會士女競光陰凝
粧耀州渚繁吹蕩人心間關林中鳥亦知和為音豈無
一樽酒自酌還自吟但悲時易失四序迭相侵我歌君
子行視古猶視今

江漢一首答孟郊

江漢雖云廣乘舟渡無艱流沙信難行馬足常往還淒

風結衝波孤裘能禦寒終宵處幽室華燭光爛爛苟能
行忠信可以居夷蠻嗟余與夫子此義每所敦何為復
見贈繾綣在不諼

縣齋讀書

出宰山水縣讀書松竹林蕭條捐末事邂逅得初心哀
狔醒俗耳清泉潔塵襟詩成有共賦酒熟無孤斟青竹
時默釣白雲日幽尋南方本多毒北客恒懼侵謫譴甘
自守滯留愧難任投章類縞帶佇答逾兼金

貞元二十
年在陽山

作公嘗曰陽山天下之窮處縣郭無居民官無丞尉小吏十餘家審此則詩無共賦酒無共斟其誰與樂此乎蓋是遠方來從游戶外屢常滿矣篇末意必贈從游者望其報章也

南谿始泛二首

榜舟南谿上上上不得返幽事隨去多孰能量近遠陰

沈過連樹藏昂抵橫坂石麤肆磨礪波惡厭牽挽或雨

飄岸漁竟就平洲飯點點暮雨秋稍稍新月偃餘年懔

無幾休日愴已晚自是病使然非由取高蹇

此詩乃長慶間公以

病在告日所作故云餘年懔無幾是年十二月公薨始絕筆於此矣黃山谷最愛此詩有詩人句律之深意

南谿亦清駛而無楫與舟山農驚見之隨我觀不休不
惟兒童輩或有杖白頭饋我籠中瓜勸我此淹留我云
以病歸此已頗自由幸有用餘俸置居在西疇困倉米
穀滿未有旦夕憂上去無得得下來亦悠悠但恐煩里
閭時有緩急投願為同社人雞豚燕春秋

重雲一首李觀疾贈之

天行失其度陰氣來干陽重雲蔽白日炎燠成寒涼小
人但恣怨君子惟憂傷飲食為減少身體豈寧康此志

誠足貴懼非職所當慕美尚如此肉食安可嘗窮冬百

草死幽桂乃芬芳且况天地間大運自有常勸君善飲

食鸞鳳本高翔

詩眼云重雲贈李觀原板
李字下缺近本添儼字謬

齷齪

貞元十五年鄭滑大水此篇大抵
言當世之士齷齪無能為國慮者

齷齪當世士所憂在饑寒但見賤者悲不聞貴者歎大
賢事業異遠抱非俗觀報國心皎潔念時涕洟瀾妖姬
坐左右柔指發哀彈酒殽雖日陳感激寧為歡秋陰欺
白日泥潦不少乾河堤決東郡老弱隨驚湍天意固有

屬誰能詰其端願辱太守薦得充諫諍官排雲叫閭闔
披腹呈琅玕致君豈無術自進誠獨難

孟郊

唐李翱云郊詩高處在古無上平處猶下顧沈
謝隱居詩話云郊詩蹇澁窮僻琢削不暇真
苦吟而成觀嚴滄浪云孟郊之詩刻苦
其句法格力可以見矣讀之令人不歡

列女操

梧桐相待老鴛鴦會雙死貞婦貴徇夫捨生亦如此波
瀾誓不起妾心古井水

塘下行

塘邊日欲斜
年少早還家
徒將白羽扇
調妾木蘭花
不
是城頭樹
那栖來去鴉

遊子吟

慈母手中線
遊子身上衣
臨行密密縫
意恐遲遲歸
難
將寸草心
報得三春暉

劉云全是托興終之悠然不言之感復非覲寒泉之比千古

之下猶不忘談詩之尤不朽者

送遠吟

河水昏復晨河邊相送頻離杯有淚飲別柳無枝春一
笑忽然歛萬愁俄已新東波與西日不惜遠行人

巫山行

見盡數萬里不聞三聲猿但飛蕭蕭雨中有亭亭魂千
載楚襄恨遺文宋玉言至今晴明天雲結深閨門

靜女吟

艷女皆妬色靜女獨檢蹤任禮耻任粧嫁德不嫁容君
子易求聘小人難自從此志與誰諒琴絃幽韻重

苦寒吟

天色寒青蒼北風叫枯桑厚冰無裂文短日有冷光
猷石不得火壯陰正奪陽調苦竟何言凍吟成此章

古怨別

颯颯秋風生愁人怨離別含情兩相向欲語氣先咽
心曲千萬端悲來却難說別後唯所思天涯共明月

征婦怨

良人昨日去明月又不圓別時各有淚零落青樓前
君

淚濡羅巾妾淚滴路塵羅巾常在手今得隨妾身

古薄命妾

不惜十指絃為君千萬彈常恐新聲至坐使故聲殘棄
置今日悲即是昨日歡將新變故易變故為新難青山
有蘼蕪淚葉長不乾空令後世人采掇幽思攢

劉云其聲如樂

府為近此復以苦語勝

湘妃怨

南巡竟不返二妃怨逾積萬里喪蛾眉瀟湘水空碧

劉云

不苦死形容
自得大意

冥冥荒山下古廟收貞魄喬木深青春清

光滿瑤席褰芳徒自薦靈意殊脉脉玉佩不可親裴徊

烟波夕

車遙遙

路喜到江盡江上又通舟舟車兩無阻何處不得遊丈
夫四方志女子安可留郎自別日言無令生遠愁旅鴈
忽叫月斷猿寒啼秋此夕夢君夢君在北城樓塞淚無
回収寄恨無回輶願為馭者手與郎回馬頭

古別曲

山川古今路縱橫無斷絕來往天地間人皆有離別行
衣未束帶中腸已先結不用看鏡中自知生白髮欲陳
去留音聲何言前咽愁絕填心胸茫茫為君說荒郊烟
莽蒼曠野風淒切處處得相隨人那不如月

苦思

劉云語雖如此極是

感懷

秋氣悲萬物驚風振長道登高有所思寒雨傷百草平

生有親愛零落不相保五情今已傷安得自能老

聞砧

杜鵑聲不哀斷猿啼不切月下誰家砧一聲腸一絕杵聲不為客客聞髮盡白杵聲不為衣欲令遊子歸

長安早春

旭日朱樓光東風不起塵公子醉未起美人爭探春探春不為桑探春不為麥日夕出西園祇望花柳色乃知田家春不入五侯宅

去婦

君心匣中鏡一破不復全
妾心藕中絲雖斷猶牽連
安知御輪士今日翻迴轅
一女事一夫安可移再天
君聽琴中言哀哀上絲絃

別怨

一別一回老志士白髮早

劉云便極頓挫殆不可復得

在富易為容

居貧難自好

劉云亦通透有味

沈憂損性靈服藥亦枯槁
秋風

遊子衣落日行遠道君問去何之
賤身難自保

劉云古意沈著

甚有
餘情

勸酒

白日無定影清江無定波人無百年壽百年復如何堂

上陳美酒堂下列清歌勸君金屈卮勿謂朱顏酤松柏

歲歲茂丘陵日日多君看終南山千古青峨峨

劉云起得似苦

曲折又極豪
暢善道人意

獨愁

前日遠別離昨日生白髮欲知萬里情曉臥半牀月常

恐百蟲鳴使我芳草歇

春愁

春物與愁客遇時各有違
故花辭新枝新淚落故衣
日暮兩寂寞飄然亦同歸

秋夕貧居述懷

臥冷無遠夢聽秋酸別情高
枝低枝風千葉萬葉聲

劉云

創體淺井不共飲瘦田常廢耕
今交非古交貧語聞皆輕

劉云
說盡

落第

曉月難為光，愁人難為腸。
誰言春物榮，起見葉上霜。
鵲失勢，病鷗鷯。假翼翔，棄置復棄置。
情如刀，刃傷。

劉云世上

苦語搜
索畧盡

秋懷

秋至老更貧，破屋無門扉。
一片月落牀，四壁風入衣。
踈

夢不復遠

劉云
精語

弱心良易歸，商葩將去綠。
繚繞爭餘輝

野步賤事少，病謀向物違。
幽幽草根蟲，生意與我微。

失意歸吳因寄東臺劉侍郎

自念西上身忽隨東歸風長安日下影又落江湖中離
婁豈不明子野豈不聰至寶非眼別至音非耳通因緘
俗外調仰寄高飛鴻

獨宿峴首憶長安故人

月迴無隱物況復大江秋江城與沙村人語風颼颼峴
亭當此時故人不同遊故人在長安亦可將夢求

蘇州昆山惠聚寺僧房

昨日到上方片雲掛石牀
錫杖莓苔青袈裟松栢香清
磬無短韵古燈含永光
有時乞鶴歸還訪逍遙場

遊終南龍池寺

飛鳥不到處僧房終南巔
龍在水長碧雨開山更鮮
步出白日上坐依青谿邊
地寒松栢短石際道路偏
晚磬送歸客數聲落遙天

過分水嶺

山壯馬力短路行石齒中
十步九舉轡迴還失西東
谿

水變為雨懸崖陰濛濛客衣飄颻秋葛花零落風白日
捨我沒征途忽然窮

立德新居

疎門不掩水洛色寒更高曉碧流視聽夕清濯衣袍但
立仁義德未覺登涉勞遠岸雪難盡勁枝風易號霜禽
各嘯侶吾亦愛吾曹

遊終南

南山塞天地日月石上生

劉云未知其下云何
即此其山有不容至

高峯夜

留景深谷晝未明
山中自正路險心亦平
長風驅松栢聲拂萬壑清
即此悔讀書朝朝近浮名

劉云
警異

西山經靈寶觀

觀即尹真人舊宅

道士無白髮語音靈泉清
青松多壽色白石常夜明
放步霽霞起振衣華風生
真丈秘中頂寶氣浮四楹
一片古關路萬里今人行
上仙不可見孤策徒西征

連州吟

春風朝夕起吹綠日日深
試為連州吟淚下不可禁
連

山何連連連天碧嶽峯哀猿哭花死子規裂客心蘭蕊
結新佩瀟湘遺舊音怨聲能剪絃坐撫零落琴

山中送從叔蘭赴舉

石根百尺松山眼一片泉倚之道氣高飲之詩思鮮於
此逍遙場忽奏別離絃却笑薜蘿子不同鳴躍年

送從弟郢東歸

爾去東南夜我無西北夢誰言貧別易貧別愁更重曉
色奪明月征人逐羣動秋風楚濤高旅榜將誰共

答郭郎中

松栢死不變千年色
青青志士貧更堅
守道無異營每彈
瀟湘瑟獨抱風波聲
中有失意吟和者
淚滿纓何以報
知者永存堅與貞

贈鄭夫子魴

天地入胸臆吁嗟生
風雷文章得其微
物象由我裁宋玉
逞大句李白飛狂才
苟非聖賢心孰與造化
該勉矣鄭夫子驪龍
今始胎

汝墳蒙從弟楚村見贈時郊得入秦楚村適楚
朝為主人心夕作行客吟汝水忽淒咽汝風流苦音北
闕秦門高南路楚石深分淚灑白日離腸遶青岑何以
寄遠懷黃鶴能相尋

留別知己

共照日月影獨為愁思人

劉云怨痛復不可堪

豈知鷓鴣鳴瑤草

不得春一片兩片雲千里萬里身雲歸嵩山陽身寄江
之濱棄置復何道楚情吟白蘋

感別送叔簡校書再登科東歸

長安車馬道高枕結浮陰下有名利人一人千萬心黃
鶴多遠勢滄溟無近潯怡怡靜退姿泠泠思歸吟菱唱
忽生聽芸書迴望深清風散言笑餘花綴衣襟獨恨魚
鳥別一飛將升沈

與韓愈李翱張籍別

朱絃奏離別華燈少光輝物色豈有異

劉云亦不料
下句如此人

心顧將違客程殊未已歲華忽然微秋桐故葉下寒露

新鴈飛遠遊豈重恨送人念先歸夜集類羈鳥晨光失
相依馬跡遶川水鴈書還閨闈常恐親朋阻獨行知慮
非

上河陽李大夫

上將東神畧至兵無猛威三軍當嚴冬一撫勝重衣霜
劍奪衆景夜星失長輝蒼鷹獨立時惡鳥不敢飛武牢
鎖天關河橋紐地機大軍奚以安守此稱者稀貧士少
顏色貴門多輕肥試登山岳高方見草木微山岳恩既

廣草木心皆歸

李少府廳弔李元賓遺字

零落三四字忽成千萬年
那知冥寞客不有補亡篇
斜月弔空壁旅人難獨眠
一生能幾時百慮來相煎
戚戚故交淚幽幽長夜泉
已矣難重言一言一潸然

覽崔夷遺文因紆幽懷

崔沒
南方

墮淚數首文悲結千里墳
蒼冥且留我白日空遺君
仙鶴未巢月哀鳳先墜雲
清風獨起時舊語如再聞
瑤草

罷歲隄桂花休氛氲萬物與我心相感哭江濱

悼吳興張衡評事

君生雪水清君沒雪水渾空令骨肉情哭得白日昏大
夜不復曉古松長閉門琴絃綠水絕詩句青山存昔為

芳春顏今為芳草根獨問冥冥理先儒未曾言

劉云語
不盡白

又高調之
不可解者

唐詩品彙卷二十